



[www.BibleForChildren.org](http://www.BibleForChildren.org)

# Génesis 1



Gallarinancho manaraj  
imapis captin Tayta  
Dios camaran  
syëlutawan cay  
pachata.



Cay pachaga manami canan  
caycashannöchu caran.

Manami imapis caranchu.

Chacay yanauyaycaj yacu  
juntashalla caran.


Chay yacu

janallanchömi


Tayta Diospa

Espiritonga

tumaycaran.



Chaura Tayta Diosga «¡Achicyaj cachun!» niran. Niptin  
achicyaj ricacuran. Achicyaj cajta «junaj» niran. Chacay  
cajtana «pagas» niran. Chaytami camaran rimir  
junajcho.




Chaypita Tayta Dios niran: «Asulyaraycaj cachun yacucuna ishcayman raquicänanpaj.»


Asulyaraycämojta Tayta Dios jutichaparan «syëlu» nir.  
Chaytami camaran ishcaj caj junajcho.



Chaypitana Tayta Dios niran: «Ura caj yacu juc pachallaman shuntacächun allpa ricacänanpaj.»  
Chaura nishannölla caran. Chaqui cajtami «allpa» niran. Shuntacasha caj yacutanami «lamar» niran.  
Chayno camarcu Dios ricaran llapanpis alli cashanta.



Chaypita yapay niran: «Allpapita wiñamuchun llapan  
casta jachacuna, muruyoq gnewacuna, tucuy-niraj  
wayoj yöracunapis». Chaura  
nishannölla caran.  
Chaycunatami camaran  
quimsa caj junajcho.



Nircur camaran intitawan quillata; inti junajpa  
achicyänanpaj, quillana chacaypa  
achicyänanpaj. Chaynömi  
goyllarcunatapis camaran.  
Chaycunatami camaran  
chuscu caj junajcho.





Chaypita Tayta Dios niran:  
«Tucuy casta yurichun  
yacucho tiyajcuna,  
chayno pacha janampa  
pärejcunapis.»  
Chaycunatami camaran  
pichga caj junajcho.




Chaypita Dios niran: «Tucuy-niraj animalcuna yurichun manshu cananpaj y chucaru cananpäpis. Chayno cachun garachaypa purejcunapis.» Chaura nishannölla llapanpis caran.




Chaypita Dios niran: «Canan runata rurashun  
quiquinchi-nirajta. Paypa munayninchömi canga  
pescäducuna, pärejcuna, manshu caj chucaru caj  
animalcunapis, chayno garachaypa purejcunapis.»  
Llapan rurashancuna amatar  
alli cashanta ricar Dios  
cushicuran. Chaycunatami  
camaran sojta  
caj junajcho.



Tayta Diosga rurashan runata churaran Edén wertaman  
chaycho arunanpaj y ricananpaj.




Chayman churar runata  
cayno willaparan: «Cay  
wertacho caycaj  
yöracunapa  
wayuynincunaga  
llapanpis  
micunayquipämi.  
Ichanga ama micunquichu  
allita mana allita  
musyachicoj yörapa  
wayuynillanta. Chayta  
micushpayquega  
wañunquipämi.»



Chaura runaga jutincunata  
churapasha manshu caj chucaru  
caj animalcunapatawan pärej  
cajcunapatapis. Ichanga  
mayganpis manami allichu caran  
paypa yan'guinpaj  
ni yanapänanpäpis.



Chaymi Tayta Diosga runata wañuy puñuyman  
puñucächichiran. Puñushanyaj juc custillanta jorguran.  
Nircur aychanta allchacächichiran.  
Chay jorgushan custillanpitanami  
Tayta Diosga warmita ruraran.  
Nircurna runa cajman pusharan.



Chaypitami runaga mamanpa taytanpa  
maquinpita yargun warminwan mana  
raqicaypa tiyananpaj. Chayno tiyarmi  
ishcan ricacun jucnayllanöna.





Tayta Diosga runacunata fiyupa  
cuyarmi japallan cuyay wamranta  
cachamuran Payman pipis yäracoj  
cäga mana wañunanpaj chaypa  
ruquenga imaycamapis  
cawananpaj.



Romanos 3:23 Llapan runami juchayojlla caycan.  
Chaynöpami salbacoj Tayta Diosninchipa ñaupanpitapis  
carucho caycanchi.

Romanos 6:23 Jucha rurayllacho cawajcunapa pägonga  
wañuymi. Tayta Dios gomashanchimi ichanga Tayta  
Jesucristuwan imaycamapis cawananchipaj caycan.

Hebreos 9:27 Chayno juc cutillami pi-maypis wañun.  
Chaypitaga cawarimonga imano goyashanpitapis jugasha  
canallanpänam.

Efesios 2:8,9 Tayta Diosninchichi cuyapäcoj carmi  
Jesucristuman yäracuptiqui salbashurayqui. Manami  
imatapis rurashcanquichu salbasha canayquipaj. Chaypa  
ruquenga quiquin Tayta Diosninchichi munarmi  
salbashurayqui. Manami allicunata rurashayquipitachu  
salbashurayqui. Chaymi pipis mana alli-tucongachu  
«caytami wactami rurashcä» nir.



Romanos 10:9,10 Chaura Jesucristo Taytayqui cashanta willacorga y wañushanpita Tayta Diosninchi cawarachimushanta rasunpa riguerga salbashami canquipaj. Jesucristuta cawarachimushanta riguiptinchëga Tayta Diosninchi allimi ricamëshun. Jesucristo Taytanchi cashanta niptinchëga salbashami cashunpaj.

Juan 3:16,17 «Tayta Diosga runacunata fiyupa cuyarmi japallan cuyay wamranta cachamuran Payman pipis yäraoj cäga mana wañunanpaj chaypa ruquenga imaycamapis cawananpaj. Diosninchëga cay pachaman wamranta cachamusha payman yäraojcunata salbananpämi, manami castigasha cananpächu.»



1 Juan 5:11-13 Tayta Diosga willachimashcanchi Wamran Jesucristuman riguir mana ushacaj cawayta tarinanchipaj cashantami. Chay cawayga Wamrallanchömi caycan. Tayta Diospa Wamranman yäraojcunaga mana ushacaj cawaytami tarin. Mana yäraoj cajmi ichanga chay cawayta mana tarengachu. Gamcunamanga cartata apaycächimö Tayta Diospa Wamranman riguishayquipita mana ushacaj cawayta tarishayquita musyanayquipämi.



# Génesis 1-2

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: Bob Davies; Tammy S.

Quechua, Huallaga Huánuco Bible (qub) © 2010, Wycliffe  
Bible Translators, Inc. All rights reserved. In cooperation with  
Asociación Cristiana JAWCA.

<https://www.bible.com/bible/1088/MAT.1>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

